

光緒山西通志

名宦錄七

錄一之七

山西通志第一百七

賜進士出身頭品頂戴兵部侍郎兼都察院右副都御史巡撫山西提督軍務臣張煦等
旨監修

守令

明洪武至正德

胡維賢定遠人洪武五年以平陽同知陞太原知府清謹端正剔蠹蒐弊解紛決壅談笑處之創修太原府治見葉砥碑記

王天爵南部人以賢良舉知太原府直諒不欺初赴召時太祖問所讀經以書對因試欽若昊天文稱旨問治州縣如何對曰首在得民心民心既得則州縣事治矣又問以知府對曰當戒左右無爲州縣擾則府事治矣既又問以布政使對曰是則臣見所未及也太祖歎息稱善遂以太原命之居官

有治績

施文學尙嵐知州時尙嵐遺黎僅存文學撫綏有法民獲復蘇乃按古酌今於有關治化者悉力修舉祀名宦

杜斌洪武初任嵐縣以廉能著績民傳頌之

楊榮祖寶應人任交城課農桑均徭役後以憂去民思慕之潘原英山東厯城人太原知縣改築城池重葺廟學雅善謀士當兵戈凋殘之際興賢育才紘誦不輟祀名宦

尹暹安豐人任興縣政平訟簡賦役均平陞知慈州民思其惠立善政碑後遷平陽府同知

韓文寶徐溝知縣措置有方公廨學校壇壝靡傳以次修舉祀名宦

姚翁直隸永平人榆次知縣公廉謹恪涖政有爲民懷其惠

建臨汾縣學祀名宦

劉觀直隸保定人進士任太谷知縣善催科不事敲扑而輸將競勸聽訟能得情政事之暇督諸生讀書親爲講授以考績去行李蕭然擢御史累官至參政祀名宦

宋烜唐縣人由人材任祁縣廉慎有爲以才行超卓遷御史終知府

陳棟儀封人任文水崇尚文學以禮導民

徐本洪武初任平陽府知府建廳署葺壇廟清驛傳荒殘景象煥然一新民有苗氏子家貧母篤老乞丐以養歷年不懈周以衣食俾獲遂其志尋奉召入朝

徐鐸南昌人洪武初以戶部侍郎改知平陽府濬永利池改建臨汾縣學祀名宦

李諒山東濰縣人洪武二年以中書檢校任翼城知縣性樸
素遇事持以公正修建壇壝廟學移縣治以避水患除奸宄
以安良善祀名宦

丁憲直隸棗強人臨汾知縣勤其官能得士民心政績最著
祀名宦

洪彥昇福建莆田人進士任汾西知縣修學校建廟壇立廡
舍厝注有方民不爲擾祀名宦

周郁山東濟南人襄陵知縣持身嚴潔爲政寬宏均賦役平
獄訟民爭德之擢渾源知州祀名宦

陳宗哲歸德人任岳陽招集流亡改科田稅民樂歸之
劉亨遵化人任汾西爲政公平操守廉潔陞本府同知

徐政湖廣大冶人洪武三年任蒲州知州愷悌慈祥民服其

化當兵火後翕然有熙暉遺意祀名宦

汪德洪武初萬泉知縣廉敏有肆應材當開國初悉心興舉久之規模乃立祀名宦

蔡景武汜水人洪武初知潞州以公勤著陞嘉興知府

劉任原昌平人知潞州政行茂著德澤及民陞本省參政

張璧蒙城人洪武初知潞城縣修舉廢政招撫流移政行期年吏畏民懷

崔鳳河南項城人知黎城縣時當兵燹後井里盡墟官廳秩祠僅存壁趾鳳下車招復流移撫恤如子因以其暇修舉頽廢邑漸以治升直隸大名府同知

袁有常直隸正定人襄垣知縣政寬不弛值大饑多方撫綏民無失業

茹志道洪武八年任汾州知州厲精治具壇墀廟祠學校官署以次畢舉而勞來有方閭里不擾人咸稱之

紀正隴州人知汾州有善政歷升府尹

顧碩天台人元時進士洪武初任石樓縣能才善治百廢具興民多受其福奉祀春秋至今感慕

殷近仁嘉興人博學能文與其弟原誠原善友愛安貧養志洪武初以孝弟舉授平遙知縣未幾親喪葬祭盡禮服終以所著蒞政戒銘四十二篇獻之於朝擢廣西參政

齊政山陽人孝義令每黎明起視事無繁簡皆立判暇則循行阡陌導民樹藝野無曠土俗臻富庶升戶部郎中

武信潞州人介休知縣持身以廉牧民以德縣署學校壇廟多所增創後升陝西僉事人多思慕之

韓偉崞縣人平遙知縣清慎仁恕庶務畢興

李祥湖廣人洪武初以人才舉知澤州時干戈甫定城郭蕭然乃建州治修學校民不知勞招集流移延師訓教境內稱治云

王堅福州人以人才知澤州作興學校整修廟社使民有方蒞事勤慎州人稱之

李芾鄧州人陽城知縣勸課農桑愛民如子凡事務求節費時多興作民不知擾既去民思之

王珪知陽城縣建養濟院惠民藥局及倉廩多惠政

鄭允先天台人洪武間任渾源州仁愛有學公暇卽詣學與諸生講論經史歲餘閭閻充足士風興起立祠祀之

陳立誠洪武間知應州創建悉出經畫諸務皆由措置改築

城池移修廟學規模宏遠永爲依賴

石享鳳翔人洪武間知朔州勸民力穡訟至立得其情兩諭解之民皆感悅坐事免父老爭赴闕頌其治行乞留詔從之周至善洪武間任榆社知縣均賦役停訟獄能公能勤上下稱之祀名宦

邵善高郵州人洪武六年任沁源令首建縣治公廡修立學校招集士類升工部郎中

鄭孟珏興山人由人才知沁源勸農興學均平賦役升左督府斷事

程宗道舒城人洪武間任平定州知州時當草創宗道悉力吏治披荆棘撫凋瘵使閭閻有起色典制具舉

鄭居破孟縣知縣值兵燹後逃亡不可數計居敬悉力招徠

漸次復業而壇壝公宇以時修葺規模具備

吳原庸江南濠州人壽陽知縣時經兵荒民多失業原庸招集流散教之力作建縣治毀淫祠諸務釐然具舉

邵子俊孟縣知縣性剛直遇事慷慨具得體要尤能悉人情偽以片言決之祀名宦

王靄孟縣知縣清甯寡欲凡所建設悉準民情政事之暇躬至閭閻教以孝弟祀名宦

鍾友諒浙江錢塘人洪武間以舉人任忻州知州有長材嘗開國初安輯殘黎創制立法修舉城郭公署祠廟壇壝咸備

擢金華知府

楊大德靜樂知縣有德政修碾河堤壇舍廟祠公署多所營造

葉砥浙江山陰人以進士任定襄知縣當大兵後境內蕭然
砥悉心招撫殘黎乃有起色雅善屬文一時碑版多出其手
擢考功郎中與修永樂大典

侯彥寶建昌人洪武間知代州政教兼舉後升應天治中
劉英順天寶坻人繁峙知縣經理賦役號均平嘗以抗疏言
事解官去父老數百人備列治狀詣闕保留得復任考滿改
雲陽縣祀名宦

蔺普整府谷人洪武間知保德州創立之始治績居多

張謙明初由解州判升平陸尹忠信篤敬慕司馬君實爲人
秩滿占籍夏縣四方之士多歸之卒葬司馬墓側

閻育會稽人以禮部員外郎改任夏縣有循良稱

顧登洪武十年任絳州知州精彊有心計凡廟社祠壇踵前

故經理者或修或建規制悉備祀名宦

李公諱澹州人中書省樞授稷山知縣勤慎公廉修舉廢墜後調江西新喻縣民攀戀不忍其去

崔宏毅丹徒人任垣曲值羣盜競起設法弭之民賴以安後升湖廣僉事

陰煜容城人任聞喜以廉幹稱

王汝霖江西湖口人以進士任河津知縣性廉敏有理煩治劇才政事修舉民安其化開國初治行最著祀名宦

李昇蓋厓人洪武初舉明經知永和縣坐事降五臺縣典史以秋霜殺禾請賑獲罪百姓訴於朝特詔升夔州知府祀名宦

辛耀卽墨人以工科給事中出知永和爲政公廉以農桑學

校爲首務累升陝西按察使

張先洪武十一年任靈石縣恤民愛士時當草創百廢具興

以上洪武時

張羽陝西武功人舉人建文三年任文水縣建治靡學邑有稱十虎三彪一太歲者悉按法徙之時以爲能

王士嘉字道亨武城人建文中由國子生除大同山陰知縣善決疑獄有齋錢百緡臥樹下失之者士嘉曰此樹爲祟吾將治之趨駕出士民傾城往視偵不往者果得盜代王內藏失物戶局如故士嘉曰此必狙公教狙竊之乃陳幣於庭呼羣狙過伺而觀之果有狙攫去詰其主皆服人以爲神後爲禮部右侍郎致仕卒

以上建文時

郝瑾邯鄲人永樂中任太原縣有惠政既去人多思慕之

汪添昂麻城人任祁縣以循良著績

劉俊直隸淮安人榆次知縣器宇軒豁遇事周詳慎重措置得宜未浹期頌聲丕作祀名宦

萬觀字經訓南昌人永樂十九年進士知嚴州府治行爲海內第一服闋嚴金衢民交乞之朝廷異焉補平陽府政績益茂有芝生堯祠棟上士民皆言使君德化所致觀曰太守知奉職而已芝非吾事也考滿擢山東左布政使卒

楊睿河南柘城人平陽府知府明習治體厝注咸合民情未數月刑清政簡境大治尋卒于官祀名宦

劉濬臨川人永樂初任臨汾守身廉謹政平訟簡吏民不敢欺升湖廣僉事

傅榮洋縣人任曲沃以剛明著聲

艾敬三原監生永樂中知長子縣有政聲

張軌清潤人永樂初以監生知吉州起復汾州政善民安任滿奏留加四品俸後以疾致仕

劉以文黃岡人永樂間以温州府照磨擢陽城令明於政體不矯飾爲廉不姑息爲惠歷九載民乞留加二級又九載治行優優化洽於民及致仕去民慕之不忘

周郁濟南人永樂間知渾源州時旱蝗郁齋沐虔禱蝗飛出境川南有虎傷人郁牒于神是夜虎果入籠中後升荊州知府所在民有餘思

張復長葛人永樂間任朔州以才幹稱

石亨陝西鳳翔人永樂中知遼州爲政仁恕民有去思碑

呂昭字克明江南崑山人永樂間沁州知州先以薦授徐州

訓導上書言事蒙嘉納改浦城縣丞升今官貧不能治裝浦城人釀金贈之卻弗受至徐州天甚寒猶衣單衣前受業弟子爲製一裘質寒驢泣沁益著廉謹子且舉進士貽書戒之勉其以廉自守言甚厲沁人至今思之

李本淨靈寶人永樂間任孟縣知縣仁慈不苛嘗期以德化民境內嘉禾有一本三四穗者人咸謂善政所感

宋鎮知保德州存心公正蒞政勤能撫字有方士民頌德

林元叔任解州秉心正直履行光明剖決如流施教不怠

劉珪興平人知夏縣廉能懋著明於大體不矜苛細吏畏民懷仕至山東左參議

蘇浩河南南陽人以進士任安邑廉謹事無大小必審處之寬厚不苛祀名宦

蘇洪南陽人知安邑縣以平勤仁恕著稱

俞士真江南婺源人以進士任芮城知縣清白有特操先官
郎中風采大著及蒞芮能以古循良治穡糶小弱均賦役修
學校興舉悉中民情而規爲措置百度具飭祀名宦

霍毅蒲城人永樂間以刑部員外出任大甯公平忠厚剖決
詳明以縣地磽瘠諭民植桑聚以活典利除害民安其業越
三年復原官後擢本省僉事亦以振肅聞

楊瓊蠡縣人永樂末進士知趙城縣課績爲山西最仕至浙

江右布政使卒

以上永樂時

楊春汶上人宣德間任文水政尙簡易時稱爲良牧

孫慶安定州人任興縣多所營繕不取於民後陞監察御史
王磐山東沂州人宣德初知浮山縣廉鯁不屈遇旱齋戒自

賁徒跣拜禱得雨而後已及去民攀留泣下

黃壽靖州人宣德初知潞州嚴不入苛吏民畏服任滿當代潞人保留復歷二考致仕

燕雲咸甯人潞州知州甚著聲績

陳道宣德間知石州清政簡有德政碑

王憲鄞縣人宣德初知陵川縣政平訟簡民賴以安及代去民遮道送之

段浩齊河人宣德中知遼州爲政公直民甚悅之

舒本諱餘姚人知平定州安靜不擾惠愛及民民多懷之

任泰陝西咸甯人宣德間任保德州知州廉直無私遇事立決雖當艱大無少滯人推公敏祀名宦

王汝積浙江金谿人宣德間以舉人知絳州絳居民稠密產

薄稅重多健訟汝積謂人給斯教可行教行斯訟可息躬歷隴畝勸農桑課勤情不數年土田悉墾漸饒裕乃大葺孔子廟修舉學政勵諸生延師儒教民間子弟雖愚且賤懇懇誨之不倦旁邑民閒以事至亦必教以敦本節用之道凡有徵集第書片紙付里甲悉踴躍樂赴無敢後者舊俗好鬪不勝輒投井死親屬厚誣必至破產乃已嚴禁之有自斃者槩不受理劫盜出其途能先知卽掩捕置之法在任九年訟息獄空教化大行當考績遽卒士民勒其政蹟于石祀名宦以上宣德時

張瓚字宗器孝感人正統十三年進士知太原府有善政後巡撫四川移總督漕運卒

劉文莊直隸正定人太原府知府習吏事知民隱興舉悉當

聽訟明敏祀名宦

劉因鹽城人正統初以布政司檢校擢陽曲縣知縣能以廉
自守涖政明敏無留牘累官應天府治中祀名宦

劉純山東歷城縣人正統十年任嵐縣剛直不阿人皆稱頌
郝鳳直隸人嵐縣令修城捍民設阱禦虜

王璉咸陽人任嵐縣以廉能稱

劉敏直隸大興人以舉人任太原縣知縣修葺城垣濬鑿濠
塹練習吏事行寬於嚴擢太原府同知祀名宦

王彧直隸開州人正統六年任洪洞縣知縣廉幹有善政嘗
遇大水禾稼漂沒彧履畝親勘卽以其狀上聞得免租稅

賈珪巴縣人汾西知縣清勤仁恕

張廉山東泰安人正統初任蒲州州判擢本州知州政務實

惠不市虛聲嘗以憂去職民盧靜等以千金賄拒不受相率走闕下乞留命仍治州事課吏讀律教民耕織無牛種木棉者爲之勸借修學宮舜廟及河海神祠平反冤獄尋致仕去民肖像祀之

刁正東鹿人正統初知潞州政尙慈祥尤善作興士類後升武昌府知府

徐兗山東商河人以太學生知長子縣募丁壯建城樓設器械以備邊警歲歉加意賑恤民無流移

洪鈞新城人以舉人知屯留縣有德政芝草生于堂柱

張璟臨潼人知潞城縣涖官清慎修學造士尤得人心升苑馬丞

李善岐山人正統中以進士知汾州重建州治修舉廢缺廉

以律已勤以愛民厯升真定知府

閻昇陳州人正統初知介休縣蒞政不苟撫字有方因民逋逃爲之申免糧稅後卒於官居民巷哭之

王儉平涼人知介休縣愛民如子有犯不忍加刑

黃彪平樂人正統間以舉人知應州振濟有方催徵不擾祀名宦

邢誠鄆縣人正統間知遼州爲政勤儉深得民心每朔望詣學爲諸生講書史臺臺不倦祀名宦

許通泗州人正統間知平定州性剛果善斷吏畏民懷

史魁平鄉人正統間靜樂知縣有謀略能任艱鉅洎任時邊警日至魁繕城垣裕倉儲設守禦皆有法度復集丁壯教以騎射於是人有固志上下相安尋擢蔚州知州

張智正統中知五臺縣在任九年政多善績

吳惠江西浮梁人正統七年以進士任解州知州質凝重亦復廉幹有爲御衆接下具有法度嘗貸錢于民遇逋賦卽收其息足之又時行民間聽紡織聲勸懲其勤惰遇貧不能婚者悉給以貲俾成禮修葺廟學取諸囊中無所擾嘗欲開鹽場利百姓爲當道所沮悒悒累日比入覲喜甚謂可面奏其事會卒京邸不果解人聞之皆流涕祀名宦

雷縉陝西同州人以舉人任夏縣知縣墾荒田濬水利凡有興作俱關百年大計嘗值編審差役視貧富無規免者暇時召父老子弟以孝弟勤儉戒勸之祀名宦

李學河南祥符人正統四年任絳州知州執法不撓洞悉民隱所與舉悉得體要民肖像羊舌廟中祀名宦

劉智山東長城人以監生任絳縣知縣性溫厚爲政以公平著歷九年百姓走闕下乞留晉六品階仍知縣事又九年始致仕歸祀名宦

李哲知垣曲縣因舊城狹隘兼以南面湮沒展修高丈餘民賴保障厥功甚偉

包得仁蒙陰人知絳縣法令嚴明豪強懾服才能卓越調文水

胡貞扶風人正統初知永和縣嘗買牛數百給貧民耕種修廟學廳舍築城郭

何子聰直隸吳橋人以進士任趙城知縣嗜讀工書爲政體悉民情以愷悌著而建城創廟爲百姓永利厥功尤偉祀名

宦以上正統時

劉震字伯威河南洛陽人景泰七年任榆次知縣撫民以恩尤慎於刑獄豪強警服盜賊自化祀名宦

李維新陝西狄道人以監生任徐溝知縣政以振飭爲先洎任九年擢中城指揮祀名宦

張玘直隸霸州人以監生知清源縣重學惠民後升霍州知州祀名宦

高安河南睢州人以進士令文水揮霍有長材處煩劇裁決裕如施爲有次第嘗修縣廨開渠水迄成功不用民間一錢擢監察御史祀名宦

張雲平谷人景泰四年以舉人知臨縣廉潔無私政事修舉庭無獄訟學校振興升濮州知州至大同府知府祀名宦

王澤霑化人以監生知介休縣法令嚴明威制豪強人心帖

服廟廡齋舍皆所增修

馬榮長汀人以監生知石樓縣盛德鴻才時皆頌之

沈純東平州人知孝義縣甫下車卽飾學宮庀祭器整壇壝修城隍邑有王才里當西出之路山束岷艱於行墮高堙下俾十餘里間曠坦可通兼軌民以負租逃者招之復業蠲其租旣去民思之不忘立遺惠碑

彭鏞湖廣石首人介休知縣性廉介涖官以公勤著嘗疏水利蠲逋賦繕城郭凡利於民者無不舉祀名宦

梁杲甯鄉知縣嚴明有才略承己已變創建城池永爲保障民甚德之

任通易州人景泰間以舉人知陵川縣修廢振墜勞績茂著有遺惠於民

霍瑄字廷璧鳳翔人由鄉舉入國學授大同通判用薦就擢知府也先擁英宗至城下瑄與理餉侍郎沈固等出謁奉命括金帛充犒固悉所有獻之已而復至郭登戒嚴弗應瑄號泣從水竇匍匐出叩馬嗚咽衆露刃叱之不爲動因獻英宗服物出金帛犒軍英宗嘉歎密諭瑄與登堅守瑄還也先數出沒大同渾源伺軍民樵采脫歸者率傷殘瑄具爲奏老弱聽暫徙發粟賑而所留城守丁壯除賦役秩滿當遷鎮巡諸臣乞留詔加山西右參政仍治府事英宗復位德瑄及固徵拜瑄工部右侍郎而固亦以石亨薦起爲戶部尙書旣而巡撫上瑄治行賜誥旌異瑄在大同時巡撫年富被逮瑄資其家還里爲鎮守大監韋力轉所惡撻之十餘瑄至是以聞且言力轉每宴輒用妓樂服御僭侈強取部民女爲妾力轉被

逮許瑄上兩釋之

胡貞扶風人先知永和景泰間推應州買牛給耕雪冤除獄政聲益茂祀名宦

章綸桐城人以給事中請應州判尋擢知州洞達治理案無留牘敏練仁恕有功地方歷官參政

黃鉞舒城人景泰間以舉人知遼州聰明果斷蒞政克勤修學校率百廢士民思慕不忘祀名宦

梁昱江南崑山人景泰間以舉人任平定州知州性仁厚文學政事卓然爲一時冠比卒士民罷市哭之

朱鏡齊河人景泰間五臺知縣抑暴扶良修廢舉墜境內清肅後知代州及告歸道出五臺民留三載敬愛不殊疇昔

胡士甯江西樂平人景泰元年稷山知縣廉幹有爲蒞任時

見城池頽廢慨然以修濬爲任勞來有方祀名宦

朱凱肅甯人知垣曲縣興學校勸農桑政績甚著升太僕寺

丞以上景泰時

王允延津人天順間任祁縣牧民有方既去人思之

孫緝豐城進士任嵐縣剛毅不苟決斷如流吏畏其明嘗重

修文廟升御史

王準陝西神木人嵐縣知縣清廉勤慎修學宮朔文教士風

丕變祀名宦

王珏字廷玉山東昌邑人天順六年以歲貢任翼城知縣清

勤端恪撫細民如子民亦愛如父母間出米豆奉之輒欣然

樂受少有犯法立治之不貸威信甚著解官去爭奪肩輿肩

之前受管者亦競前泣下邑故多循吏然必以山東王爲稱

首山東王者翼人追稱之辭也祀名宦

葉穆福建人天順初以舉人知汾州一年調吉州巡撫李侃薦其去汾人思到吉人悅一廉如水六事孔修尋升河間府同知

伍秀松溪人以舉人知吉州尋以賢能調汾州詔旌異之

汪清固始人景泰間進士授監察御史嚴毅剛正因忤權貴天順元年左遷知臨縣興學勸農通水利減徭役鋤強梗旌善良凡有便於民者以次修舉丁外艱去士民送之至有涕泣者祀名宦

姚昱甯鄉知縣性坦易遇事明決公以持已勤以蒞政卒於官

田愉安化人以舉人知平遙縣邑素號難治以清介自持蒞

事精察鋤奸去暴人以剛大稱之

羅綱餘姚人以舉人知遼州威惠並施加意學校公暇卽課
試諸生祀名宦

高亮灤州人由舉人知武鄉縣常巡阡陌課農桑省民疾苦
道遇田婦饑耕者取視之皆稊秕藜藿流涕曰民窮如此牧
民者之罪也後入覲民爭餽贖儀一無所受

陸鏞江南崑山人以進士任保德知州性溫厚尙德化誠能
格物嘗遇旱禱雨立應擢工部郎祀名宦

趙愷陝西清水人天順七年任河津縣愛民如子號稱長者
邑大旱禱雨有應立碑儀門左

張諒河南鹿邑人以貢士任稷山縣清介甘淡泊優禮文士
布德施惠吏民悅服而革弊除奸以嚴行愛尤得惠人遺意

擢知吉州祀名宦

以上天順時

張鼎字大器陝西咸甯人成化間以進士知太原府鼎受業薛文清與聞性命之指涖太原土豪孟某挾其家人暴里中鼎按以法指揮董敬誣人下獄已論死鼎廉其枉出之後歷官戶部右侍郎

陳鑑臨清人由舉人知岢嵐州蒞政三載教化大行歲旱省刑撤從禱城隍曰吾與公幽明雖殊同主一方忍眎斯民坐斃邪乃以鐵索各繫其頸同暴烈日中傾之大雨任內嘉穀生祀名宦

張紀岢嵐知州警敏有才智舉不失當尤長於救荒貧窶廢業者施給牛種流民皆歸

朱信字中孚趙州人以舉人令榆次有清操不事鞭扑而張

弛鑿鑿中理境內大治祀名宦

梁琮字廷玉蠡縣人以舉人令榆次貌古樸言訥訥不出口而彊毅有爲治具舉舉祀名宦

劉偉陝西朝邑人以進士令文水持身清慎遇事剛方有爲嘗違眾議積穀萬餘石備荒歉民卒賴之擢監察御史祀名宦

張壽陝西華陰人以舉人令太谷性高潔剛正有爲時衣舊布袍飯脫粟佐以藜藿部使過邑中供億甚菲頗怒之既入其寢室惟律一部公服一襲乃亟加優禮任九年以內擢去祀名宦

李琮順天人成化十九年知平陽府甫下車卽除積豪爲民患者數人皆預訪其款蹟繫之庭以實之均俯首伏罪由是

台郡安堵時有神明太守之頌不期年政簡刑清吏民懷之
胡睿直隸長垣人進士任平陽知府有清操臨事謹慎爲政
以精密著祀名宦

樊瑩字廷璧常山人天順末進士知平陽府有聲宏治初許
大臣保舉方面官侍郎黃孔昭以瑩應尙書王恕亦器之擢
按察使仕至刑部尙書致仕卒贈太子少保謚清惠

薛驥江南華亭人襄陵知縣先官御史稱敢言及小謫慈祥
愷悌以簡易著卒以不附權貴解組歸祀名宦

謝謙山東章邱人以舉人任襄陵性謹厚事無大小必慎以
處之不敢忽然發奸摘伏稱有爲上官屢旌異之祀名宦

劉璣字用齊陝西咸甯人進士除曲沃知縣縣產棗民有罪
令人棗贖積數萬斛歲饑賑粟不給發棗繼之正德中仕至

戶部尚書致仕卒

李咨直隸故城人以進士令襄陵明于吏事嘗置二簿記民間善惡以時勸懲歲凶煮粥食饑者纂修縣志徵文考獻稱一時信史擢監察御史祀名宦

王綸直隸開州人以進士任浮山夙負文學名待士有禮而治民尤勤嘗刻表忠勸學二錄令民間誦讀祀名宦

賴英任邱人任翼城知縣仁以御民嚴以束吏民皆慕之許鵬字雲程山陽縣人由舉人任四川邛州成化二十三年補蒲州政績優異撫按請行旌勸詔賜誥命及其父母重修學宮創建書院有碑記

崔明直隸新城人以舉人知萬泉縣慈惠精明鋤奸剔蠹興學育才治行爲一時最邑有寃死者以蝴蝶辨其獄罪人立

得螟蟲生將害稼爲禱於神鴉食之殆盡民有幼子爲狼噬
訴於神次日狼忽自斃因以示之當時稱爲五奇絳州陶參
讓銓有碑記其事

毛鳳來河南西平人進士除臨晉知縣冲年入仕民多易之
值甲辰大饑盡發倉粟以賑又募富民出貸百姓賴以存活
時盜賊蠶起乘機劫掠鳳來嚴禁四捕立磔諸市盜尋息
馬遜臨清人榮河知縣政多恤民修祠著績升太原通判
張安陝西環縣人繼毛鳳來知臨晉縣時凶荒雖脫力田無
具流離者襁望不能歸且該年稅糧催徵如故安極力請免
民獲漸甦與毛令並歌咏之

張曉陝西三原人進士任襄垣縣廉謹愛民政無不舉有清
水明鏡之謠徵拜御史官至按察使祀名宦

王紳字晉卿湖廣安化人進士知屯留縣有才畧爲政不拘一轍簿書之暇親巡阡陌勸課農桑又時進諸士于講學課藝尋擢御史累官副使祀名宦

王祐山東金鄉縣人由監生知壺關縣鋤強扶弱四民樂業以憂去祀名宦

易鶚固始人進士知長子縣剛明果斷政先躬率多惠績升御史

甯智襄垣知縣創建城樓有仁聞祀名宦

劉瓚直隸清苑人進士知襄垣縣值大饑振救有方全活甚眾祀名宦

李崙陝西臨潼人進士知屯留縣甘貧好學不事修飾時大饑役民鑿河河治而民不飢全活頗眾歷河南參政祀名宦

才寬字汝栗直隸遷安人成化間以進士任石州知州宏達
精敏有經世畧調繁潞州後以兵部尙書總制三邊仗節死
義祀名宦

劉鉞撫甯人介休知縣以廉明稱卒於官

張瓊富塗人由監察御史知介休縣愛民禮士不畏強禦政
聲丕著

李瓊河南孟縣人以舉人任孝義清敏有特操中貴過縣頗
橫肆多需索一無所應逼之則徑解衣以奉中貴愕然爲愧
謝嘗被誣繫獄事白復涖縣事節操愈勵

甯靖湯陰舉人由蘇州推官知澤州清慎之操終始如一民
有訟者必反復譬喻使之自改不輕笞一人祀名宦

陸偉字仲奇錢塘人由舉人授澤州知州時州游饑請發帑

賑救全活以數萬計所行一切守法請託不行強禦不畏甯
山衛軍民雜處久不靖懾以德威彼此帖然葺州治備倉儲
興儒學修明道先生祠民甚懷之致仕歸卒年八十九

張晟高平知縣簡易鎮靜不事表暴邑俗民無貴賤喜音樂
晟下令禁止四境肅清革淫祀民服其化停雜役民安其生
史書字獻忠靈臺人進士陽城知縣時年甚少大猗路省祭
頗輕之會新縣門其家人取餘木以去命逮之路至厲聲曰
木無幾耳遂足煩簡書取書曰木卽無論多寡亦論公私若
爲吏熟習律例獨未知常人盜官物尙以徒論耶路然然因
叱左右箠殺之閭縣皆驚在任清慎自勵愛民如子再知平
山以治行擢吏部

狄宗文甯州人以舉人知沁水縣抑強植弱禁令畫一以剛

廉著聲

陳梁涇陽人以舉人在渾源知州地有恒山素禁樵採梁請弛禁民獲利南人充大同軍役不服水土多死者梁上其狀遂各調本土衛所軍民圖像祀焉升贛州同知

張文質扶風人以舉人知渾源州時有妖狼爲祟牒城隍攝狼至磔于南壇之右歲旱禱雨立應他邑歎渾源獨稔調知渾州民思之爲立碑

蕭智寶雞舉人應州知州才稱果斷政尚清明丈土地民長如神厚學校士服其訓祀名宦

汪昱廷慶州人以舉人知應州持身清素居官公恕民安事妥吏畏弊絕祀名宦

呂文延津人知朔州性廉直人不敢干以私體恤民隱備至

尤善營建自學宮以至鋪舍胥煥然一新時稱循吏

陳鎰臨清人以舉人知遼州秉性剛毅鋤強去暴盜賊屏跡
吏畏民悅祀名宦

連盛永年人進士知和順縣蒞政公勤吏民畏懷升御史

張玘霸州人沁州知州勸課農桑作興學校流民多歸復及
代百姓赴闕奏留增秩復知州事

席勤學邠州人以進士知沁州真心愛民奏減田賦若干隆
禮學校課藝惟勤卒於官民咸哀之

白惟勤字勉之清澗人以舉人知沁州加意撫循獄訟尤能
明察時有婦暮行賊豔其首飾以沙撲面適一人突至抹之
婦目昧無從辨識賊誣抹者爲劫弗能決惟勤密函蒼頭於
箱置二囚側令二囚自相訐悉得其情比再鞠賊猶執詞如

初惟勤啟箱出蒼頭證之賊驚服求者獲免時稱爲神明升
衛輝府同知

許英甯陽人以歲貢令武鄉興學校勸農桑均徭役清詞訟
流民復業者千餘家鄉里有盜馬者畏其威復返其主民立
德政碑

吳鼎咸甯人平定州知州練習吏事爲政不拘一轍彰善瘴
惡調劑得平

朱恭鉅鹿人以舉人知壽陽縣蒞政和平民受其惠有古循
吏風

張誠陝西人以舉人任壽陽冰蘖自持寬嚴竝濟待文學士
尤加禮一時儒風丕振祀名宦

張仲文直隸易州人以舉人令樂平和厚近民興學造士尤

能以教化先吏治

趙鸞直隸東安人以舉人在樂平知縣性和易所注厝惟求宜民刑清政簡邑大治詳見德政碑

王子玉直隸寶坻人樂平知縣值歲游飢民多流亡緩賦稅輕徭役悉力招來復業者漸至二年康阜爲諸邑最乃增修學舍督諸生日夜讀書文風丕變士民爲勒政蹟于石

劉清山東壽張人以舉人在忻州知州居心平恕洩政寬和修廟學驅游民立倉庾屏盜賊善政釐然嘗遇歲荒勸富人蠲賑得粟萬石銀千兩按戶分給菜色立起秩滿去民立碑識之

馮璘永壽人靜樂知縣尋擢保德州知州兩任邊地平刑恤民俱著循績而修葺廟學敦崇教化士人尤傳誦

王節定陶人靜樂知縣存心行政悉本慈仁尋認陽曲醜賢
下士均賦平徭祀名宦

徐綬直隸昌平人以舉人任崞縣知縣時值歲饑親詣富室
給印簿貸粟以賑比稔悉爲徵還又修來宜普濟二橋濟病
涉者創養濟院養孤寡殘疾祀名宦

李英陝西寶雞人芮城知縣廉介公正有幹濟材勸農息訟
又以其餘力修衙舍閭里不擾祀名宦

言芳山東鄒平人以進士任絳州知州學有盛名居官清正
衙舍蕭然幾可羅雀尋以憂去祀名宦

賈定河南通許人以進士任絳州知州通敏有吏材遇疑難
能立爲剖畫絳有屠人誘人出殺諸谷中歸而私其妻不從
復殺之而撲其處女隨鬻他所以滅其迹事久弗白定廉得

之論如法絳有積薪逋者破產廢家仍無以償定立法通一州丁戶共足其數自是歲無逋者嘗立善惡二籍歲終覈其實誅賞有差會大飢絳人獨免因上救荒八事是年平垣曲盜規畫所及鄰境胥受賜後改易州尋復擢山西僉事祀名宦

劉觀平度州人知絳州廉勤威斷吏畏民懷居三年懇求休致得命之日卽單車就道循良之迹去就之義不愧古人茹紹賢鳳翔人垣曲知縣明斷廉能豪強屏跡

陳能安化人知絳縣有功民社政績茂著

墨春字景方高陵人成化元年以舉人知隰州仁以御民嚴以束吏崇儒興教化民成俗

董瑜內黃人以舉人知隰州爲政寬嚴得宜百廢俱興歷任

九載無大辟獄有靈芝嘉禾之異祀名宦

以上成化時

李時宏治間任岢嵐州剛柔適中賞罰必信當道才之累行旌異升漢中府同知民遮道餞送無不泣下

劉經直隸宛平人以舉人知太原縣性坦直政尚和平前令劉敏以罷有聲經以寬繼之時稱濟美擢監察御史去祀名宦

張鐸字道鳴陝西人以舉人任榆次知縣持身清介視事後閉門絕客政平訟簡吏民皆懷尋改嵐縣遮道泣留者數千人祀名宦

張鑑河間人以舉人任榆次知縣性溫和能恤民祀名宦
劉鉉陝西咸甯人以舉人任祁縣知縣有威嚴能執法人望而畏之祀名宦

楊光澤山東沂水人以舉人任興縣知縣廉而能寬撫字有方廢墜者及時建立尋調洪洞去之日老稚俱垂涕祀名宦馬圖林縣人任興縣民素頑悍公賦屢年不輸前官多被訟去圖至歎曰豈惟民之過哉蓋由刑罰不中民視官如仇讐耳當以公平處之居六年百姓化其政前所負租悉爲補輸改建文廟於城中及去與人爲立祠後任沁州知州致仕子卿登進士官山西提學副使終都御史

郭桂字時芳咸甯人元時鐵冠御史之後以進士爲令守理訟決獄人人稱服服闕補平陽知府百姓凋敝藩邸下人怙勢侮法無敢誰何桂至而盜賊息州縣平藩邸各輯其下百姓安堵新堯廟增修舜禹廟告成洪洞戶部尙書韓文年八十餘家居賓客非其人不與見乃安車入平陽謁謝曰老人

無所求強爲百姓一行耳未久擢山西右參議分蒞冀北督邊儲以病乞歸

杜忠字世臣河陰人成化戊戌進士宏治辛亥以監察御史出守平陽括蒼俞尙賢稱其百廢俱興民心愛戴庚申遷本省布政司左參政未幾拜右副都御史巡撫延緩乞休命下而卒

張文佐河南西平人以進士任平陽府知府有孝行先官襄陵以廉名及涖府事清譽益著嘗行朱子社倉法鼎新學宮延名人主師席祀名宦

姜寔陝西蒲城人以進士任曲沃縣知縣謹慎清介嘗作詩自厲後擢御史巡視河東鹽政遇歲饑撈鹽數百萬引抵民間田租復設法賑給祀名宦

周雲徐州人曲沃知縣公直廉介吏畏而民服

張賢字堯臣祥符人襄陵知縣先授單縣邑豪貴子暴橫強奪人妻女賢按治如法及涖襄陵有山泉可資灌漑爲臨汾勢家所據賢廉得立奪之返諸民擢慶陽同知遷順慶知府忤劉瑾罷歸瑾誅起太原知府時邊警甚亟游騎至太原有陳憲使者夜飲宗室第中賢單騎叩其門曰邊患孔棘非燕飲時也其慙直如此比卒襄陵人立祠祀之

李高河南虞城人以進士令襄陵剛明清勤善折獄鄰境有冤抑胥來質成嘗創置汾橋開通山坂又時集諸生講授文法在任五年獎勞者一旌異者五士民勒其善政四十餘事于石擢監察御史祀名宦

邢昭直隸三河人進士任洪洞知縣居官清慎民有訟者引

至堂前曉以義理令其愧悔復時至田間勸督農桑而崇師課士尤有禮祀名宦

張鼐山東歷城人進士襄陵知縣持躬廉謹牧民有方未決期刑清訟簡吏民畏服襄陵俗于父母喪多偷葬鼐力革之令從厚尤加意學校士類咸荷甄陶擢監察御史祀名宦

張雲河南信陽人進士襄陵知縣性平易嘗謂親民官尊嚴如神非父母斯民本意故其撫綏恩意曲至累官戶部尚書祀名宦

羅端河南鄧州人以舉人任浮山縣知縣仁厚廉明嘗遇歲荒設法振濟尋卒士民隕涕罷市祀名宦

李伸三原進士知臨汾縣王府軍校肆橫至殺人前令莫敢治伸至悉寘之法境內肅然擢御史

尹琛陝西秦州人以進士任太平縣知縣有威望立法以嚴
明勝愛民教士有古循吏風祀名宦

姚顯浙江德清人以舉人任岳陽縣知縣勤於政事愛民嘗
視之如傷嚴於馭吏悉畏服不敢肆祀名宦

胡昂字文謙直隸正定人宏治初以進士知蒲州蒞政嚴明
吏民畏服捐俸修城視公如家去之日行李蕭然州人醵金
爲贐力卻之後過郡士民攀留延款至不忍別

高騰臨潁人任榮河縣修廢舉墜訟平政理民深懷焉

徐誼長山人以貢生任猗氏縣知縣清潔不妄取遇事必審
求其當而剔奸釐弊尤以才幹稱擢靈州知州祀名宦

馬暉河南陳州人宏治間以進士知潞州性剛守潔才具明
敏大修廟學俎豆筐篚象勺千舞之類纖悉必備訪得名宦

十四人鄉賢十人建祠爲州人表帥而撫恤窮黎諸政以次畢舉在任九年以上黨人謂自建州以來所未有云

海鯉江夏人以進士知汾州政尙廉察發姦摘伏如神居一載卒民悲思之

王道山東曹縣人以舉人知石州慈祥愷惻均賦役折獄能令民感化庭累月無人跡泣任九年去民作歌頌之

鄭紀中牟人石樓知縣鋤強拯弱勸士愛民尤以冰蘖自持每朔望謁城隍誓不改操

張恕汧陽人知平遙縣歷九載仁愛如一日升汾州知州民李華等弗忍舍奏允食知州俸仍治邑事

郝槃綏德州人由代州判官改介休知縣臨政剛明事無巨細胥迎刃而解後升知潞州去之日百姓攀轅泣留爲立去

思碑

李智曹縣人家宰秉子以舉人知澤州公恕廉勤抑暴扶良
聲名藉甚士民思之

毛忠掖縣人以舉人知高平縣時凶荒甫息民力凋瘵悉心
撫綏崇重文學政教兼舉廢弛之餘多建置而民不以爲擾
楊子器慈谿人以進士任高平知縣嚴重有威望會詔遷民
兵實邊抗言不便狀事得寢盜殺人取資去其父疑逆旅主
人力白其寃尋得實乃所貨贏夫也論如律設鄉校七十所
時進諸生論文藝禁喪祭用僧道俳優又以其暇創邑志去
官後越十八年民祀諸建甯鎮聖廟之東庶安陽崔銑有記
累官河南布政司

孫磐遼東人以進士知陵川縣抑豪強恤孤弱使貧富各得

其所尤殫心風教窮鄉獨立社學築養正篇小四書養蒙大訓悉爲刊布之

王輔長安人沁水知縣奉公守法吏畏民懷

楊範洛陽人以舉人知沁水縣均賦役興學校治邑六年擢正定府通判去之日囊橐蕭然民涕泣攀留不忍舍去

楊璽禹城人以舉人知陵川縣誠心撫字政尙寬平緩徵均徭時有慈母之頌

楊恭永清人進士授高平知縣博學有器量守正不阿人歌愷悌未久卒邑人痛之

薛敬之字顯思渭南人從蘭州周蕙游以歲貢生入國學與同舍陳獻章竝有盛名成化末爲應州知州課績爲天下第一宏治九年遷金華同知致仕卒

程端山東冠縣人由舉人知朔州邃性理學於算術尤精勤政愛民不求婚上嘗扁其軒曰競辰有競辰稿并周天圖說李端直山東曹州人由舉人知朔州清慎公直爲當道重一時難決之獄悉以委之皆能辨理民以爲不冤創修朔州志齊壽蠡縣人以監生知馬邑縣禁戢凶徒撫安善類蓋令之才守兼優者

張文燧遷安人馬邑知縣忠厚誠實吏畏民懷致仕歸士民思之

高璉醴泉人由舉人任武鄉縣常誦前人言曰催科不擾是催科中撫字刑罰無私是刑罰中教化父老至今頌之

李熙曲陽人以舉人任孟縣知縣明敏有剴斷材民以訟至者以數語立決之皆醫伏訟漸息

呂琦平陰人孟縣知縣清白自厲政尙嚴凡所厝注一本獨
斷然能合民情宜土俗

王軒山東臨清人宏治間以進士任忻州知州移建學宮開
雲牧兩河鹵地立四倉備凶荒勦平土寇平刑獄均徭賦擢
員外郎歷官鳳翔知府

陳志直隸元城人以舉人任崞縣知縣廉公自持勤於其職
暇時爲諸生講論經史後封太和伯祀名宦

馬通字致遠同州人以太學生令博野束鹿皆有能聲宏治
間補繁峙知縣邑故傳邊頑梗通賦士不知學通勤於勸課
選社師訓民間子弟督胥習受書俗爲一變賦亦舉輸會大
水沒禾他邑承風旨減報通獨詣司臺力爭得報全災邑人
咸悅他邑民以不生繁峙爲恨卒於官以孫自強貴贈宮保

大學士

周山紹興人以舉人在保德州知州立心正大處事公勤土
依民懷治行爲當時最考滿當遷州人霍升等走京師請加
銜仍知州事祀名宦

李邦彥直隸薊州人河曲知縣有吏才修舉廢墜百度一新
而喫休疾苦尤至調嵐縣擢均州知州以禦流寇功遷河東
鹽運司副使祀名宦

李溥定州人解州知州以禮自持嚴而能容人皆畏敬之奸
頑屏跡升南部員外郎

姜洪廣德人以進士官御史謫夏縣知縣忠鯁有重望爲政
以嚴明勝導士以禮以節儉率民先是令雷縉慈祥愷惻人
歌慈母至是謂洪爲嚴父並立祠祀之後累官本省巡撫

李登山東東阿人以舉人任安邑縣知縣廉明公正洞悉民隱一時夙弊剷除畧盡尋以疾卒祀名宦

霍恩字天錫易州人進士知安邑縣正德時改上蔡六年流賊至死最烈贈官賜祭于蔭立祠如典制

蘇昱武邑人任絳縣知縣剛毅果斷立城市集場

王琳山東安邱人以舉人任聞喜知縣雅志廉潔爲政以威嚴勝吏習震疊豪猾聞風斂迹又以其暇葺學宮修縣志祀名宦

吳璇山東高唐人以舉人令垣曲建倉儲蓄以備歲荒增舍講習士類翕然嚮風詞繁聞喜明敏洞悉民情見文廟規制未備力以修葺爲任創兩廡易櫺星門堅緻完好祀名宦

楊澤直隸河間人進士聞喜知縣廉潔有才畧居官條理精

詳一時夙弊盡革而尤以學校農桑爲本祀名宦

艾芳大甯知縣居官清謹蒞政嚴明重修城池去之日民不能忘

向明巢縣人以舉人任趙城縣知縣禮士愛民具有成效遇

昏喪不能自給者捐俸助之卒于官祀名宦

以上宏治時

蘇民陝西人正德元年以進士任榆次知縣務持大體不事苛細民有犯者以道義諭之不率始懲以法暇日召諸生與之講解圖籍聞者奮起祀名宦

陳溥鄆陵人以進士任陽曲知縣性剛貞而勤慎措施務治民心擢監察御史祀名宦

鄭德崇字道夫山東汶上人以進士任榆次知縣性簡重爲政清而能整不樂以威刑督吏民而服其化者皆肅然奉法

後調德清縣祀名宦

張穆完縣人以舉人任榆次知縣性剛有威望遇事能斷抑
侵漁剔浮蠹尤崇獎士類貧不能存者輒捐俸給之後入覲
卒於道士民遙奠之哭聲震野祀名宦

陳悃陝州人以舉人任榆次知縣性嚴重爲政務經久遠抑
強除蠹興學校理冤抑祀名宦

韓光表直隸任邱人以舉人任徐溝知縣正直勤政事自旦
至暮治文書不輟心存愛民務令得實惠祀名宦

葛甯歸德舉人正德間自平谷教諭升太原知縣有治事才
前令修城數年不完甯至民咸樂趨一月畢工武宗由榆林
幸宣府路經太原供應之物凡百俱備民不知擾

申綸永年進士由平陸調任太原度量寬洪爲政持大體期

年升潞州知州官至按察司副使

高道邠州監生任清源知縣政寬民悅刑省令行有真父母之稱

路欽直隸永年人以監生任汾西縣知縣宅心正大持身廉潔爲政剛果立決人以私謁者謝弗與通祀名宦

侯秩直隸長垣人進士授曲沃知縣嚴重不輕輿禮正俗救荒止暴退食後引諸生與疏經史奧義一時學者以山斗歸之祀名宦

浦鉞字汝器文登人進士授洪洞知縣有異政嘉靖初召爲御史以疏救富平楊爵杖卒穆宗初復官

李暹字德進直隸滑縣人以舉人任曲沃縣知縣精敏達治澧營作勸民十二事揭通衢詳豁代納銀兩葺學宮毀淫祠

正經界嚴斥堠政教修明倉糧贏至數萬訟獄衰息又立兩驛接遞界正南北交界坊迄今遵守後擢隴州知州累官布政使參議祀名宦

元思永河南湯陰人以舉人任岳陽縣知縣廉幹有能聲尤加意學校增修聖廟尊師重士時人比之文翁焉祀名宦

葛禔順天人曲沃知縣鋤強抑暴惡人遠跡甄砌城堞民到今便之升御史終光祿卿

蔣瓚字君器山東高唐人由舉人知繁峙縣以能調翼城爲人廉平訓小民如誠子弟折獄甚愜人情升定州知州累官郎中

黃甲陝西人任汾西實心實政鑄火器修城池經亂無虞入名宦祠

馬綸直隸神武衛人以舉人任猗氏縣知縣剛毅執法無所私然仁厚不苛畏威者亦懷德擢臨清知州祀名宦

張萱應天上海人以進士知潞州潞有德風亭自唐以來稱勝地萱日夜勤民事終其任未嘗一往嚴馭吏胥不使入鄉間罷錦綺之售于上官里夫之役于藩府者不使爲民擾武宗狩大同幸臣江彬諷郡縣選嫠婦送行在所萱曰嫠婦也奈何奪人之節力爭事得寢後擢湖廣僉事潞人攀轅泣送者數萬人後復建祠祀之崔銑有記

張友直三原人以舉人任壺關縣舒徐溫雅輯縣志未就升任去

吳傑字漢甫河南杞縣人以舉人知壺關縣孤介廉潔不苟同世俗舉于鄉猶躬耕自給母亡貧不能葬流賊至傑守母

樞不去及涖官衣大布衣食脫粟飯甫四月儲倉穀二千餘石有故人稔其治行欲薦請朝傑曰使我賢耶薦不必公使我不賢耶公不必薦後卒于官至不能爲斂同官釀錢贖焉其妻弗受曰吾夫生不愛一錢豈以死易哉聞者高之

張鵬翰陝西慶陽人以進士知襄垣縣清苦自甘均荒田溢額于全徵中民不爲病復以其餘創置學田寒士賴其振恤楊盈山東章邱人以舉人知潞城縣剛介明敏有不可奪之操申禁論而強梗寒心勤勸課而士習丕變爲一時才吏民建祠於邑之東關御吏溫如璋作文記之

劉明漢州人蔭生正德間以任邱丞升任襄垣精明廉慎吏民畏懷修築城池功在後世祀名宦

苟京陝西商州人以太學生知黎城縣時流寇猖獗京備設

守禦修浚城隍添設樓櫓保障之功民甚賴之

李棠直隸清苑人正德八年以舉人任汾州知州慷慨有大節爲政以惠民爲務雅甘澹泊善理煩治劇後歷松江太原二府同知擢戶部郎中沒不能斂里人葬之立清白吏碑焉何賢河間人知汾州爲人儉政尙惠和愛與小民親狎鄉村社會邀飲皆赴亦無廢事居歲餘卒州郡人德之爲肖像以祀

郁浩永甯衛人以進士知汾州政尙簡嚴力興學校每朔望爲諸生講說經義囊橐不倦時廟學頽圯大加修葺增築泮池及龍池升戶部員外至按察僉事

王天祐陝西慶陽衛人以舉人任介休知縣家貧少與羣兒牧崆峒李夢陽遇之嘆其神俊授以學卽能領受臨魯公帖

卽神似嘗徵修孝宗實錄及涖縣事簡要務存大體而吏民咸畏服如神有分巡過縣怙勢接不以禮天祐佛然解組歸閔以仁渠縣人自華陰簿擢孝義令性勤敏日夜不輟課樹藝興學政給諸生楮膏之費時校其優劣繼修孔廟浚築城隍幹理有餘才未幾卒於官士民嘆惜之

李承嗣長安人以舉人知臨縣性節儉歷官六載終始如一外和內剛翦除土惡有古良吏風升通判

馬汝驥字仲房綏德人正德十二年進士授編修以諫南巡特調澤州知州王府人魚肉小民將法懲之王以書來屬輒投積中不視陵川知縣貪欲黜之巡按御史爲曲解不聽竟褫其官世宗初召復編修累晉禮部右侍郎卒贈尙書諡文簡

崔哲遼陽人以進士知澤州撤淫祠廣儲蓄尤愛獎進後學
課試皆有程期

王鍵永平人澤州知州革除宿弊剖決如流人服其敏

龔進高安人以進士知高平縣禁止令行政平訟理人以神
明號之升刑部主事

魏繼盛涇州人知陵川縣政教兼舉吏畏民懷

王溱直隸開州人以進士知沁水縣性明達持法嚴謹遭亂
後增修城郭安集人民升御史出爲平陽知府

董琦陽信人以進士知高平縣饒有吏材練習民事巡阡陌
間察勤惰而董戒之或耕斂不足輒捐俸以給又爲定婚儀
品節至今遵守當時爲之謠與前令楊子器並稱

杜旻錦衣衛人初爲御史有直聲正德間知大同府遭時多

故法令廢弛旻確有擔當保境庇民不爲權貴所撓士民頌之

許繼章邱人知渾源州涖官清勤自奉甚約雖古廉吏不能過及卒囊無百錢土人嘆惜

楊文奎隆德人靈邱知縣性剛方築關廂建學舍境內一新祀神祭器之屬無不周具平賊有功升應州知州邑人勒石頌德

高賈江陰人初爲刑部郎中以忤劉瑾謫知遼州誠心愛民暇則課文藝士林頌之

楊惠洛陽人以舉人知遼州置學田修公署養士愛民善詩文纂修州志

王寵平度州人以舉人知榆社縣慈祥愷悌刑不嚴而民畏

政不猛而事集蒞任七載人樂其業升鳳陽通判祀名宦
馬圖林縣人以舉人知沁州省賦除繁潔已愛下祀名宦
馮繼祖與平人以舉人知沁源縣增修城池撫弱抑強有能
吏風

景芳山東定陶人平定州知州莊重有威望不受私謁善發
奸摘伏後擢慶陽府同知

張鳳霄陝西韓城人以舉人任孟縣知縣性溫厚工文章以
經術飾吏事撫民禮士俱有成效尋以病卒遠近皆流涕

唐素宇希文東平舉人知忻州政簡易善因民招撫有術徵
科不擾升正定府同知老稚扳轅不絕三日始得出境

田登陝西長安人以進士任定襄知縣廉介有威望寬猛得
宜政事之暇親詣學宮引諸生講論經史終日不卷後擢主

事累官參政

李澤歷城人以舉人任保德州知州澤先官沔縣晉忻州及蒞保德興除利病不遺餘力民皆愛戴武宗幸山西糧餉不給澤奉部院檄召買唐家會未旬日得米三百石草十萬束公用充足中外賴之後以疾求去送者載道祀名宦

王汝安邠州人由襄陽判擢保德州知州勤於政不遑甯處修城垣學舍建八蜡廟復修惠民井石橋以濟民之病渴病涉者遇旱禱雨輒應升本府同知

王鍵永平人河曲知縣廉介有幹略善於事親母以事督責怡然受之民皆感服以績最調陽曲歷西安同知

王紘山東陵縣人以舉人任河曲知縣清正能自立以不納賄逆瑾罷官瑾誅御史解冕抗疏白之起知山陰縣祀名宦

李銳直隸河間人以舉人任平陸知縣端重不妄言動蒞政能勤自晨至夜分不倦未浹期政教修明擢平定知州祀名宦

鮮冕巴縣人知安邑縣蒞任行政以愛民爲心清操冰節有古循良風

易謨河南固始人以進士任絳州知州清而有爲熟悉民間利害興除胥得其宜政聲最著擢西安府同知樹去思碑肖像富鄭公祠中祀名宦

李文潔江西貴溪人以舉人任絳州知州性剛正遇事能洞本末斷以行之無留滯在官興學校毀淫祠均賦稅紳豪強風清弊絕擢建甯同知祀名宦

晁讓山東東阿人以舉人任河津縣知縣廉介無私遇事惟

法制是守雖權貴不爲屈祀名宦

來亨胙城人以舉人任稷山縣知縣明敏練吏事以廉自勵革除一切陋規繕城垣緝賊盜具得方略祀名宦

王一麟四川青神人以進士知絳縣政平訟簡和易近民暇日與諸生講解吟詠禱雨多應升戶部主事

李時直隸涿州人以進士任開喜知縣伉直不撓而豁達有遠略先宰長安以忤逆瑾去及涖開喜直梳寇亂談笑間守禦具備爲當路所忌仕卒不達祀名宦

王諤陝西西安人以進士任河津知縣性剛明遇訟獄立爲剖決然務持大體嘗繕完城郭改建學校政教修明擢主事歷兗州知府祀名宦

劉欽館陶人知永和縣持身清苦以邑人曠學朝夕督誘雖

隆冬盛暑不倦歷六年士多有造

以上正德時

右明洪武至正德三百四十五人

賈節城武舉人天順間知應州存心寬恕爲政慈祥人皆悅服祀名宦

胡汝礪甯夏人成化中進士累官大同知府鎮守中官不檢下繩之急中官怒汝礪卽移疾求去吏部惜其才固留之繇是益發舒敢任事官至兵部尙書卒

張綏直隸滄州人正德間以舉人任代州知州廉敏熟法律居官以幹濟稱衙署學舍頽廢者悉爲修葺又以滹沱巨津病涉者眾爲創橋以濟之祀名宦

以上三人補遺

山西通志卷一百七